

ქ. ბათუმის მუნიციპალიტეტის  
მერის 2018 წლის \_\_\_\_ ნოემბრის  
N \_\_\_\_ ბრძანებისა

**ქ. ბათუმის მუნიციპალიტეტის 2019 წლის ბიუჯეტით დასაფინანსებელი  
საერთაშორისო სპორტული ღონისძიებების შესარჩევად კონკურსის  
ჩატარების წესისა და პირობების შესახებ  
დ ე ბ უ ლ ე ბ ა**

**მუხლი 1. ზოგადი დებულებანი**

1. ეს დებულება არეგულირებს ქ. ბათუმის მუნიციპალიტეტის 2019 წლის ბიუჯეტით დასაფინანსებელი საერთაშორისო სპორტული ღონისძიებების (შემდგომში - სპორტული ღონისძიებები) შესარჩევად კონკურსის ჩატარების წესს, სამუშაო ჯგუფის უფლებამოსილებას, კონკურსანტთა შერჩევის კრიტერიუმებს, გადაწყვეტილებათა მიღებისა და საერთაშორისო სპორტული ღონისძიებების ქ. ბათუმის მუნიციპალიტეტის 2019 წლის ბიუჯეტის პროექტში გათვალისწინების წესს.

2. ქ. ბათუმის მუნიციპალიტეტის 2019 წლის ბიუჯეტით დასაფინანსებელი სპორტული ღონისძიებების შერჩევა განხორციელდება კონკურსის მეშვეობით.

3. კონკურსს ატარებს ქ. ბათუმის მუნიციპალიტეტის მერის (შემდგომში - მერი) ბრძანებით შექმნილი სამუშაო ჯგუფი.

4. კონკურსი ითვალისწინებს იმ საუკეთესო საერთაშორისო სპორტული ღონისძიებების შერჩევასა და მხარდაჭერას, რომლებშიც მონაწილეობას იღებენ პროფესიონალი სპორტსმენები, რაც მნიშვნელოვნად შეუწყობს ხელს ქალაქში სპორტული ცხოვრების გააქტიურებას, სპორტის სხვადასხვა სახეობების განვითარებას, ბათუმელი სპორტსმენების სპორტული ოსტატობის დონის ამაღლებას, სპორტული ტურიზმის განვითარებას, უცხოელი სპორტული დელეგაციების, მედია საშუალებებისა და გულშემოყვარებლების მოზიდვას, ქალაქისა და ქვეყნის პოპულარიზაციას, სპორტზე ხელმისაწვდომობის ზრდას. განსაკუთრებული ყურადღება დაეთმობა მოწვეული ქვეყნების რაოდენობას, ასევე, არის თუ არა კონკურსზე წარმოდგენილი სპორტული ღონისძიება საერთაშორისო სპორტული ღონისძიებების ან/და საქართველოს ეროვნული ფედერაციის სპორტულ ღონისძიებათა კალენდარში გათვალისწინებული, ემსახურება თუ არა სპორტული ღონისძიება სპორტის სახეობების მიხედვით აჭარის ნაკრები გუნდების დაკომპლექტებას და რამდენად არიან სპორტულ ღონისძიებაში ადგილობრივი სპორტსმენები და მსაჯები ჩართულნი.

5. სპორტული ღონისძიება უნდა განხორციელდეს და დასრულდეს 2019 წლის განმავლობაში.

6. კონკურსის საერთო ბიუჯეტი შეადგენს 300 000 ლარს.

7. კონკურსში მონაწილეობის მიღება შეუძლია ნებისმიერ სპორტულ ორგანიზაციას.

**მუხლი 2. კონკურსის მიზანი**

კონკურსის მიზანია სპორტის განვითარებაზე ორიენტირებული საუკეთესო სპორტული ღონისძიებების გამოვლენა და მხარდაჭერა.

**მუხლი 3. კონკურსში მონაწილეობის მისაღებად საჭირო დოკუმენტთა ნუსხა**

1. კონკურსში მონაწილეობის მისაღებად კონკურსანტმა ქ. ბათუმის მუნიციპალიტეტის მერიაში (შემდგომში - მერია) განცხადებასთან ერთად უნდა წარმოადგინოს შემდეგი დოკუმენტაცია:

ა) შევსებული განაცხადის ფორმა;

ბ) ამონაწერი მეწარმეთა და არასამეწარმეო (არაკომერციული) იურიდიული პირების რეესტრიდან;

გ) ანალოგიური ღონისძიების განხორციელების დამადასტურებელი დოკუმენტაცია (მაგ. ხელშეკრულება, მიღება-ჩაბარების აქტი და სხვა) - ასეთის არსებობის შემთხვევაში;

დ) სპორტული ღონისძიების დებულება;

ე) სარეკომენდაციო წერილი (მათ შორის ერთი - საქართველოს ეროვნული ან აჭარის ავტონომიური რესპუბლიკის სპორტული ფედერაციების მიერ გაცემული);

ვ) დოკუმენტი, რომელიც ადასტურებს კონკურსზე წარმოდგენილი სპორტული ღონისძიების საერთაშორისო ან ადგილობრივ სპორტულ ღონისძიებათა კალენდარში გათვალისწინებას;

ზ) თანადაფინანსების შემთხვევაში - დამადასტურებელი საბუთი.

2. კონკურსანტის მიერ წარმოდგენილი ინფორმაცია უნდა შეესაბამებოდეს სინამდვილეს, რაც უნდა დასტურდებოდეს სათანადო დამადასტურებელი დოკუმენტით.

3. მერია უფლებამოსილია საჭიროების შემთხვევაში მოითხოვოს დამატებითი დოკუმენტაცია.

#### **მუხლი 4. კონკურსის ეტაპები**

1. კონკურსი მოიცავს ორ ეტაპს:

ა) დოკუმენტების მიღება - პირველი ეტაპი;

ბ) დოკუმენტების განხილვა და კონკურსანტებთან გასაუბრება - მეორე ეტაპი.

2. დოკუმენტების მიღებას აწარმოებს მერიის ადმინისტრაციის საქმისწარმოების განყოფილება (მის: ქ. ბათუმი, ლუკა ასათიანის ქ. N25).

3. კონკურსანტის მიერ წარმოდგენილი დოკუმენტაცია ეგზავნება ქ. ბათუმის მუნიციპალიტეტის მერიის განათლების, კულტურის, სპორტისა და ახალგაზრდობის სამსახურს (შემდგომში - სამსახური), რომელიც შემდგომი რეაგირების (მოკვლევის პროცედურა, საბუთების შესწავლა, შესაბამისობის დადგენა) მიზნით გადაეცემა განათლების, კულტურის, სპორტისა და ახალგაზრდობის პოლიტიკის განყოფილებას (შემდგომში - განყოფილება).

4. განყოფილება:

ა) შეისწავლის კონკურსანტის მიერ წარმოდგენილ დოკუმენტაციას და შეჰყავს ინფორმაცია კონკურსანტთა რეესტრში;

ბ) არასრული დოკუმენტაციის/მონაცემების წარდგენის შემთხვევაში, კონკურსანტს წერილობით აცნობებს აღნიშნულის შესახებ განაცხადში მითითებული საკომუნიკაციო საშუალების მეშვეობით და აძლევს 5 სამუშაო დღეს ხარვეზის გამოსასწორებლად;

გ) სამუშაო ჯგუფის წევრებს ელექტრონულად უგზავნის განსახილველად შემოსულ დოკუმენტაციას;

დ) სამუშაო ჯგუფისათვის წარსადგენად ამზადებს მოხსენებითი ბარათის პროექტს კონკურსანტთა მიერ წარმოდგენილი დოკუმენტაციის წინამდებარე წესით დადგენილ მოთხოვნებთან შესაბამისობის თაობაზე.

5. არასრული დოკუმენტაციის წარმოდგენის შემთხვევაში სამუშაო ჯგუფი არ განიხილავს კონკურსანტთა განაცხადებს.

6. კონკურსის მეორე ეტაპზე ხდება დოკუმენტაციის დეტალური განხილვა და კონკურსანტებთან გასაუბრება.

7. გასაუბრებაზე კონკურსანტი ახდენს კონკურსზე წარმოდგენილი საერთაშორისო სპორტული ღონისძიების პრეზენტაციას. პრეზენტაცია უნდა იყოს მოკლე (არაუმეტეს 15 წუთისა). პრეზენტაციის შინაარსი უნდა მოიცავდეს კონკურსზე წარმოდგენილი საერთაშორისო სპორტული ღონისძიების მნიშვნელობას, პრობლემის არსს, მიზნებს, მონაწილე სუბიექტთა რაოდენობას, მოსალოდნელ შედეგებს, ძლიერ და სუსტ მხარეებს, შესაძლებლობებსა და საფრთხეებს, სამოქმედო გეგმას, კონკურსანტის გამოცდილებას და ღონისძიების ხარჯთაღრიცხვას.

#### **მუხლი 5. კონკურსის ჩატარებისა და სამუშაო ჯგუფის მიერ გადაწყვეტილების მიღების ვადები**

1. განაცხადების მიღება იწარმოებს 2018 წლის 26 ოქტომბრიდან 26 ნოემბრის ჩათვლით, 09:00 საათიდან - 18:00 საათამდე.

2. შემოსული განაცხადები განიხილება 2018 წლის 05 დეკემბრამდე.

## **მუხლი 6. სამუშაო ჯგუფის მიერ გადაწყვეტილების მიღების წესი**

1. სამუშაო ჯგუფის მუშაობას ხელმძღვანელობს სამუშაო ჯგუფის თავმჯდომარე, ხოლო მისი არყოფნისას - სამუშაო ჯგუფის თავმჯდომარის მოადგილე.

2. სამუშაო ჯგუფი:

ა) ამტკიცებს იმ კონკურსანტთა სიას, რომელთა განაცხადები არ შეესაბამება წინამდებარე წესით დადგენილ მოთხოვნებს და იღებს გადაწყვეტილებას მათი კონკურსიდან მოხსნის თაობაზე;

ბ) განიხილავს კონკურსანტების განაცხადებს (საკონკურსო დოკუმენტაციას) და ახდენს შეფასებას;

გ) წარუდგენს მერს ინფორმაციას კონკურსის შედეგების შესახებ.

3. სამუშაო ჯგუფი უფლებამოსილია, თუკი სხდომას ესწრება სრული შემადგენლობის ნახევარზე მეტი მაინც.

4. კონკურსანტთა შეფასება ხდება შემდეგი კრიტერიუმების მიხედვით:

ა) **სპორტულ ღონისძიებაში მონაწილე უცხოელ სუბიექტთა (სპორტსმენები ან სპორტული გუნდები) რაოდენობა - მაქსიმალური ქულა - 10:**

ა.ა) 3 სუბიექტამდე - 5 ქულა;

ა.ბ) 3-დან 6 სუბიექტამდე - 7 ქულა;

ა.გ) 6 და მეტი სუბიექტი - 10 ქულა.

ბ) **სპორტულ ღონისძიებაში მონაწილე ადგილობრივ სუბიექტთა (სპორტსმენები ან სპორტული გუნდები) რაოდენობა - მაქსიმალური ქულა - 5:**

ბ.ა) ღონისძიებაში არ მონაწილეობენ ადგილობრივი სპორტული სუბიექტები - 0 ქულა;

ბ.ბ) ღონისძიებაში მონაწილეობენ ადგილობრივი სპორტული სუბიექტები - 5 ქულა.

გ) **ანალოგიური ღონისძიების ჩატარების გამოცდილება - მაქსიმალური ქულა - 10:**

გ.ა) არ გააჩნია ანალოგიური ღონისძიების ჩატარების გამოცდილება - 0 ქულა;

გ.ბ) გააჩნია 3 წლამდე გამოცდილება - 5 ქულა;

გ.გ) გააჩნია 3 - დან 6 წლამდე გამოცდილება - 7 ქულა;

გ.დ) გააჩნია 6 და მეტი წლის გამოცდილება - 10 ქულა;

დ) **ღონისძიების მხარდამჭერის სტატუსი - მაქსიმალური ქულა - 10:**

დ.ა) არ ჰყავს მხარდამჭერი - 0 ქულა.

დ.ბ) კერძო სპონსორი - 5 ქულა.

დ.გ) აჭარის სპორტული ფედერაცია/აჭარის ავტონომიური რესპუბლიკის განათლების, კულტურისა და სპორტის სამინისტრო - 7 ქულა;

დ.დ) ეროვნული სპორტული ფედერაცია - 8 ქულა;

დ.ე) საერთაშორისო სპორტული ფედერაცია - 10 ქულა.

ე) **თანადაფინანსების ოდენობა - მაქსიმალური ქულა - 15:**

ე.ა) არ გააჩნია თანადაფინანსება - 0 ქულა;

ე.ბ) 15%-მდე თანადაფინანსება - 3 ქულა;

ე.გ) 15%-დან 30%-მდე თანადაფინანსება - 5 ქულა;

ე.დ) 30%-დან 50%-მდე თანადაფინანსება - 10 ქულა;

ე.ე) 50% და მეტი თანადაფინანსება - 15 ქულა.

5. შეფასების საბოლოო შედეგი განისაზღვრება ქულათა დაჯამებით.

6. დაფინანსების პრეტენდენტია პროექტი, რომელიც მიიღებს მაქსიმალურ ქულათა არანაკლებ 60 პროცენტს. თუ მაქსიმალურ ქულათა არანაკლებ 60 პროცენტი მიიღო რამდენიმე პროექტმა და მათი საერთო ბიუჯეტი აღემატება 300 000 ლარს, დაფინანსების რეკომენდაცია, არსებული ბიუჯეტის ფარგლებში, გაეწევა იმ პროექტებს, რომლებსაც უფრო მაღალი ქულა აქვს მიღებული. თანაბარი ქულების შემთხვევაში - გადამწყვეტს წარმოადგენს სამუშაო ჯგუფის უმრავლესობის დასაბუთებული გადაწყვეტილება.

7. შერჩეულ პროექტთა შორის თუ ყველაზე დაბალი ქულების მქონე პროექტის ბიუჯეტი გადააჭარბებს კონკურსის ჯამურ ბიუჯეტს, ამ პროექტის ავტორი სამუშაო ჯგუფს წარუდგენს დაზუსტებულ პროექტს.

8. სამუშაო ჯგუფის რეკომენდაცია აისახება სხდომის ოქმში, რომელსაც ხელს აწერს სამუშაო ჯგუფის თავმჯდომარე და მდივანი.

**მუხლი 7. სპორტული ღონისძიების ქ. ბათუმის მუნიციპალიტეტის 2019 წლის ბიუჯეტის პროექტში გათვალისწინების წესი**

1. სამუშაო ჯგუფის რეკომენდაცია, სხდომის ოქმის შედგენიდან არაუგვიანეს 2 სამუშაო დღისა წარედგინება მერს.

2. მერი, სამუშაო ჯგუფის რეკომენდაციის წარდგენიდან არაუგვიანეს 2 სამუშაო დღისა, გამოსცემს ბრძანებას კონკურსის შედეგების დამტკიცებისა და სპორტული ღონისძიების ქ.ბათუმის მუნიციპალიტეტის 2019 წლის ბიუჯეტის პროექტში გათვალისწინების თაობაზე.

3. ინფორმაცია კონკურსის შედეგების თაობაზე წერილობით ეცნობება კონკურსანტებს მერის ბრძანების გამოცემიდან 2 სამუშაო დღის განმავლობაში.

**მუხლი 8. კონკურსში გამარჯვებული პირის ვალდებულებები**

თუ კონკურსში გამარჯვებული პირის მიერ, საკონკურსო ვადებში, ვერ მოხერხდა ამ დებულების მე-3 მუხლის პირველი პუნქტის „ვ“ და „ზ“ ქვეპუნქტებით გათვალისწინებული დოკუმენტაციის წარმოდგენა, ეს დოკუმენტაცია წარმოდგენილი უნდა იქნეს არაუგვიანეს 2019 წლის 31 მარტისა, წინააღმდეგ შემთხვევაში - ღონისძიების განხორციელებასთან დაკავშირებით ხელშეკრულება არ გაფორმდება, ხოლო გაფორმებული ხელშეკრულება - შეწყდება.